

Songtexte 2018

Und hier sind sie, die Songtexte der Stedtlichiiisser 2018:

Stedtlichiiisser 2018 mit dem Programm ShitTV – Eifach, BILLIG, Primitief.



1 Der Plan B - Einfach, Billig, Primitief!

Fischlin, Stauber, Brotz und Co.: Jetzt isch gnue!
Löht üs mit SRG-Gelafer in Rueh!
Mir zahle nümm!!
No, no, no, no, no - No Billag!
Dä Staatsfärnseh-Stuss
Mit däm isch jetz Schluss.
Mir zahle nümm!!


Wenn ig im Färnseh d Sandra Boner gseh
Bruuch i gäg s Wätter grad e Maage-Tee!
Das zahli nümm!!
No, no, no, no, no - No Billag!
Und au dr Kassesturz
Isch doch e krasse Furz!
Das zahli nümm!!

Mir zahle nümm
S isch e Gruus!
Mir zahle nümm
Für dä Stuss!
Mir zahle nüüümm
Jetzt isch Schluss!
Mir zahle nüüüümm

Arena, Rundschau, Glanz und Gloria:
Das ghört „bestattet“! - Das müesse mir nümme ha
Mir zahle nümm!
No, no, no, no, no - No Billag!
Jetzt wird kei Stutz me kassiert.
Mir wei de gseh was passiert.
Mir zahle nümm!!

Stedtlichiiisser präsentiert die Alternative:
Der Plan B
SHIT TV. Einfach. Billig. Primitief.

Melodie: Electric Light Orchestra; Don't bring me down



2 #MeToo

Kei Maa grapscht mi aa!
Und kei Sau do inn beläschtigt mi!
Dir, das Fүүr isch us. Keine het me Pfuus do im Bundeshus!

Kei Maa grapscht mi aa!
Und kei Sau do inn beläschtigt mi!
I frog' mi, isch am Änd, das ganze Parlamänt derart impotänt?

I träge sexy Blüüsli und e churze Rock
Und Parfüm wie ne Venus – doch kei Pflock het Bock

Nei!

Kei Maa grapscht mi aa!
Und kei Sau do inn beläschtigt mi!
Was isch das für nes Puff? Keine isch spitz druff. Nid emol im Suff!

I go i Lift und warte do.
Es chönnt sogar dr Buttet cho!
Doch nei i stoh im Räge:
S nimmt jede lieber d Stäge!

Chuum lueg i eine fründlech a
So flüchtet dä, so schnäll er cha,
tuet mit me Merkblatt fuchtle ...
Het s do de nur no Schwuchtle?!!

I säge Euch, das Gschnorr vo Sex und so isch alles Scheisse!
S'isch wohr! - So wohr i Magdalena Martullo-Blocher heisse ...

Melodie: Max Raabe; Kein Schwein ruft mich an



3 Ab uf Cremines!

Em Strickler sini Viecher müesse uf Cremines - dört bliibe si dinn
Me müesst se süsch erschieße. Cremines macht vil me Sinn!
Im Thal het s paar Wisäntli, die si dört nid sehr in - si dört gar nid in
Me möcht se glaub erschieße. Doch mir si für Cremines!

Au s US Presidäntli -


he, spinnsch, das chasch nid singe

dasch jo Ufruef zum Terrorismus

riskiersch e Strofazeig

hee, dr CIA ghört de das:

Mir wäre für Cremines!!



Melodie: Volkslied; Alle meine Entlein

4 Chranki Kasse

Mi Porsche isch verchauft
Mi Rolex hei si pfändet
Im Casino nüt me lauft
Und dr Golfclub isch beändet
Derbi verdien i guet
Kei Ex-Frau macht mir Quale.
Nei, mir gfrürt all Monet s Bluet
Wenn i d Prämierächtnig zahle!

Refr.:

Chrankekasse, Chrankekasse: Wie-n-ig die Rächtnig hasse!
Chrankekasse! - S isch nid zum fasse!
Chrankekasse! - Wie tuesch du d Prämie aapasse?
Chrankekasse, hesch e-n-Egge ab, e krasse!
Chrankekasse! - Hesch im Schrank nümm alli Tasse?

Chasch nid alls mis Gäld verprasse, Chrankekasse!
Chrankekasse: Dir e Schutt i Arsch z verpasse
Das wär Klasse! Chrankekasse!
Jo i haue ab, flüchte gäge Föhn und Bise
Denn süsch schloht si zue: Mini Franchise!
Jo i haue ab, süsch het mi mi Kasse gfunde
Und mi Zahltag – isch verschwunde!

Du Dis Härz wird lang no blüete
Wenn d Concordia lohsch wüete.
Hesch es Portmonee ir Hang?
Bir Visana hesch s nümm lang!
Git s nüt z erbe me für d Chinder
Steckt d Groupe Mutuel derhinder.
E Prämierächtnig vor Helsana
Und du chasch s Begräbnis plana!!

Melodie: Helene Fischer; Herzbeben



5 Uf em Wyssestei

Mir isch do z äng! I bruuche Platz
Ab uf e Bärg! Säg i zum Schatz
I weiss e Ort ganz läär und frei:
Mir gö is Kurhus uf e Wyssestei!
Im Glaspalaszt isch alles frei
Räntiert das ächt? Natürlech, nei.
Doch Jürgen Hofer seit: Mir mache s doch
Eso wie d Bärner ufem Jungfrauoch!

Schalala schalalalalei
Mir tüe Chinese ufe Wyssestei!
De git s e Gwünn, dasch jo was alli wei
Dank vil Chinese ufem Wyssestei

Dr Pfarrer vor Kapälle het de nie me frei
Dank de Chinese ufem Wyssestei.
Är traut se zwüsche Myrte und Salbei
Für dass d Chinese vil Chinese hei
Und stellt e Schwinger em ne and're s Bei
De gseh s d Chinese ufem Wyssestei.
Serviirt dir s Kurhus wider fade Brei
Frässe s d Chinese ufem Wyssestei

Machsche Blueschtfahrt mit dir Frau im Mai
Gsehsch vil Chinese ufem Wyssestei
Es freut sech au d Stadtbolizei
Und büesst Chinese ufem Wyssestei!
Und fahrsch mol ufe mit em Gondeli
Gsehsch: S het vil meh – aber s si alli z chli
D Türfalle isch bi dir uf Höchi Chnöi
Wäg de Chinese ufem Wyssestei

Doch sinkt ir Stadt d Bevölk'rig progressiv
Und isch dr Kurt au nümm re-produktiv
De rette d Grössig vo dr Stadt elei
Üsi Chinese ufem Wyssestei!

Melodie: Polo Hofer; Wyssbüeh



6 Muetig, gschid und scharf

*Es isch e sunnedürfluetete Samschti-Morge gsi, right downtown of Old Soledurn.
I bi grad d Houptgass zdüruf gloffe, do ghör I uf einisch es eigenartigs Grüüsch... :*

Nei, do cha me nid parkiere! Du bisch bi orange über d Stross!
I – tue – do - s - Tempo - kontrolliere! Das Rüepli do isch zweni gross!

Das Bistro-Tischli stoht z wit vore! Das git e Buess grad nach Bedarf.
Wenn Gäld hesch, de hesch scho verlore! Denn mir si muetig, gschid und scharf!

Mir si d speedy Tschugger! Ohni üs lauft nüt ir Stadt!
Jo, mir si d speedy Tschugger! Mir schaffe gäng uf 1000 Watt:

A: Zentrale vo Weibu 4 antworte! Notfall! Falschparkierer bim Baseltor!

B: Weibu 4 verstande. Wieso Notfall? Schrib ne doch uf!

A: Das goht ebe nid.

B: Wieso de nid?

A: He weisch de Du öppe, wie me „Hie und äiuh“ schribt?!

Wenn dr Kanton nümme zahlt, die Chälber,
Zieh mir no Buesse i gäng Stau
So finanziere mir üs sälber
Und di Rollator preichts de au!

Jo mir si schlau und hei Kultuhur
Au Gränche het für üs Bedarf!
Jedem Verbräche uf dr Spur
Denn mir si muetig, gschid und scharf!

Mir si d speedy Tschugger! Ohni üs lauft nüt ir Stadt!
Jo, mir si d speedy Tschugger! Ab 100 Buesse git s Rabatt!!

A: Herr Wachtmeischer, so säget mer doch wo mi Ma isch!

B: He dänk verhaftet!

A: Aber dr Ärscht het doch gar nüt gmacht!

B: Schpilt ke Rolle! Üses Motto isch: „Bürgerin, mir näh di Ärscht!“

Melodie: Pat Boone; Speedy Gonzales



7 Wars of Stars

Dr Donald seit zum Kim: "Hör uf, süsch gib dr eis a d Ohre!

I schicke paar Marines zu Dir, die tüe de wie ne More!"

Dr Kim git zrugg: "Halt d Lafere, du impotänte Greis!

I schicke mini Volksarmee, die chunnt und zwickt dr eis!"

"Und dass es nume weisch: I ha jetz au e rote Chnopf!

Wenn I dä drücke, blibt vo dir nur no ne blonde Schopf!"

"Mi Chnopf dä isch vil grösser", meint dr Donald nume stur:

"Wenn I dä drücke, betoniert's di ungsplitz I mi Muur!"

Dr Sekretär vo r UNO het dr Fride chönne rette!

Und das ohni uf Washington und Pyöngyang müesse z jette:

Dank Hilf vor Schwiz het är de bede Striithähn gseit, es läng:

"Em erschte, wo no öppis seit, schick I dr Constantin!!"

Melodie: John Williams; The Main Theme from Star Wars / Mani Matter; Wilhelm Tell



8 Airport zue!

S hei zwe Fründe im ne Sportflugzüg in Gränche welle lande
Und si funke: "Hello Gränche! Weli Pischte isch vorhande?"
Us em Äther ghörsch es Chräsche, denn chunnt d Antwort dütlech gnue:
"Chöit s vergässe, üse Airport isch bis nöchshti Wuche zue!"

"Nüt mit Lande! Flüget witer! Uf Mülhuse oder Bärn
Oder chömet nöchshti Wuche wider. Denn näh mir Euch gärn."
Ohni Moscht? E Katastrophe! – Doch mir gseh: Dir heit s verstande:
Üsi Gschicht isch frei erfunde, denn wär wett scho z Gränche lande?!

Melodie: Mani Matter; Alpeflug



9 Watterschürmine

Taifun und Sturm si fuecht und wild und chutte alles zäme.
I jeder Sterchi chasch se ha und si hei Fraue-Näme.

Orkan, Windsterchi 10: Do flügt der alles ume Grind!
Und d Schäde si gewaltig. Eso öppis heist "**Burglind**".

D Windsterchi 9 heisst "**Evi**". Do wirtsch ohni Schutz nid alt!
Die luftet ganzi Auto furt und knickt all Böim im Wald.

Windsterchi 8 und 7 bloose Ziegle vo de Dächer.
Denn gö die Schäde langsam zrugg, die Fraue wärde schwächer.

Chli Lärm und warmi Luft heisst "**Fränzi**". Wirtsch se überläbe.
Und d "**Bea**" isch Windsterchi NULL: Si süslet und blibt chläbe!

Melodie: Volkslied; Zehn kleine Negerlein



10 Mi Wauwau

D Sunne schiint. Es isch nid chalt
Fido chumm, mir göh i Wald.
I go zur Tür go d Jagge reiche
Dr Fido secklet mir um d Scheiche

I sueche d Leine und s Mässband,
Muulchorb, Hundepfiiffe und Sextant,
Luege, dass mir Robidog-Seckli hei
Und au dr Bisidesodorisierigsspray.

Dr Fido kläfft und proteschiert
Die Leine ghört doch filettiert
Ä Leine bruucht vo üs Vierbeiner keine.
Är wädlet zornig mit em Schwanz

Und seit mit finem Augeglanz:
S gäb andri, wo muesch säge: Ab a d Leine
Wär het erloh bi Gott
Zum Bischpil s Wurschtverbott?

Wär settig Regle wott, dä ghört a d Leine
Oder nimm dr Fluri Kurt
Däm laufe d Lüt jo furt
Mi Hund luegt uf und chnurr: Do bruuchts e Leine!



Melodie: DJ BoBo; Chihuahua

11 Doping

Mir si erscht im Ishockey, Mir hei halt vil Is dehei
Mir gwünne jede Biathlon, Mir si halt e Gwünn-Nation!
Mir si starch und mir hei Müüs, und dr Sportarzt luegt zu üs
Doch Dir sit fies und heit üs gmobbt! - Ätsch! Heits gseh: Mir hei nid dopt!


Wodka – Cocacola
Süschi hei mir nie nüt gha!
Chasch üs gärn ha, WADA
Mir si sportlich wider da!

Kamilletee! – Nasdarowje!

Doping, das het Wärt wie Guld. Wär nid dopt, isch sälber tschuld.
Macht dr Gmeinrot d Bürger schiiissig, dopet ne gäg Tempo 30!
Doping gits jetz au fürs Danke. E Löffel längt fürs Hirni z schwänke.
Dr Geischt wird klar. Dir merket scho: Dä Gmeindroot het nüt settigs gno.

Rum und Cocacola
Süschi hei die nie nüt gha.
Drum göht jetz alli dra:
Setzet dene d Sprütze a!

Melodie: Andrews Sisters; Rum and Coca Cola



12 Shithole Country

Me het sich Müeh gä, dass dr Trump d Schönheit vo r Schwiz entdeckt
Und het drum alli "Shithole-Countries" guet vor ihm versteckt.

Me het für ihn e Charte gmacht vor Schwiz, wie si üs gfiel:

Am Jura-Südfuess chunnt nach Bettle sofort Biel.

Melodie: Solothurner Lied

